

東
華
續
錄

東華續錄

咸豐三十一

臣王先謙敬編

臣陶濬宣恭校

咸豐四年甲寅春正月辛丑朔陝西巡撫王慶雲奏報到任日期得旨汝外省情形尙不甚熟事事總要虛心處處皆要畱心積誠相感數月後自可貫通○壬寅袁甲三奏賊匪新得廬州聞城內米糧尙足火藥柴草均已缺乏乘其根基未定指日以大兵臨之或可收功旦夕萬一根深蒂固又將勞師糜餉應請旨迅發大兵併力廬城剋期會剿並請明降諭旨何人能用兵卽歸何人統帶不得以勢分相臨不得以意氣用事提臣和春臣聖心之所簡在踵江忠源之後者庶幾在此臣思江忠源謀勇兼全此次孤軍嚴守三十六日卒以援將不前而殞其命臣檢其來書及咨會奏藁

皆一己盡瘁匪躬無一語歸咎於人無愧古之純臣查其弟江忠濟江忠濬隨同剿賊久歷戎行所帶楚勇皆能用命請特旨激以公義動以私忿將江忠濟江忠濬等優予官職卽畱安徽軍營會剿當可備將材之選並請飭會國藩迅帶礮船練勇由湖北九江而來與北兵會合作水陸夾擊之勢又刑部郎中李文安奉旨回籍督帶鄉勇協辦防剿該員原籍距臨淮一百餘里情形熟悉呼應較靈臣卽令其駐守臨淮聯絡鄉團藉壯聲威可期得力又奏陝甘總督舒興阿於廬州告警之初已蒙飭令赴援並令將所帶之兵酌分和春乃該督擁兵自衛誓不肯分嗣接和春來信述及該提督紆道親赴伊營面商一切該督堅持成見不惟不分自帶之兵卽他人之兵亦不允其抽調致令和春束手無策甫到店埠而廬州已報失守江忠源守城逾月疊向舒興阿告急該督不肯

前進況本月初十日前後江忠源疊戰獲勝賊勢已衰城門時啟
時閉我兵若乘勢環城亦可藉圖牽掣舒興阿一步不進紮營西
北路賊卽由西面陷城謂非庸懦而何臣奉到諭旨據舒興阿奏
初次進剿卽獲大勝查該督之摺係上年十二月初九日拜發初
九日以前探報未聞有該督接仗獲勝之事卽江忠源初九日來
信亦未提及一字不知其所謂大獲勝仗如何陳奏是其任性偏
執復敢捏詞飾奏致令廬郡一失中原大局幾難收拾應請速伸
乾斷治以應得之罪勿令再誤事機 上諭內閣前任安徽巡撫
江忠源之弟江忠濟江忠濬管帶楚勇疊次剿賊均屬出力江忠
濟業經加恩以知府用六品銜江忠濬並著加恩以知州用仍令
管帶兵勇隨同剿賊以副朕篤念忠藎之至意○諭前因舒興阿
救援廬州不力又不撥兵交和春統帶以致郡城失守降旨將舒

與阿革職令其戴罪自效因思此等畏蕙無能之員卽畱置軍營亦屬無益著和春飭令舒興阿卽行回旗不准逗畱該革督所帶之兵前已有旨統歸和春管帶著卽督率各路將弁兵勇迅圖克復廬州如有不遵調遣者卽著以軍法從事○諭毓通奏喀喇沙爾土爾扈特盟長署理汗印喀屯鄂克庫濟拉噶爾情願捐輸銀兩以備軍需呈請轉奏請旨一摺土爾扈特盟長署理汗印喀屯鄂克庫濟拉噶爾以見在籌備軍需具呈情願捐銀五千兩衷悃出於至誠深堪嘉尙惟念該汗等此項銀兩藉資生計著無庸賞收以示朕務恤蒙古之至意○諭軍機大臣等勝保前奏十八日進仗時連放神威礮因下藥太多以致震裂管礮章京黃周賓卽時陣亡各等情朕卽決其是日進仗必係失礮無疑批令據實明白回奏本日據該大臣覆奏裂礮三尊礮兵因係廢物未及護回

是果有失敵情事而該大臣仍未肯明言支吾掩飾顯有不實不盡著再據實覆奏毋稍含糊至各路防兵屢次諭令嚴密堵截何以任令賊匪占踞于家莊等村究係向何路竄出著卽查明帶兵之員據實嚴參此股零匪僅有數百人官兵見已將賊匪圍困該大臣又派兵前往剿截務卽嚴飭各路將弁趕緊將此股剿洗淨盡儻再有疏失仍令竄逸惟勝保是問據奏進攻賊巢情形屢云賊勢窮蹙已極粉飾鋪張敷衍塞責而至今賊勢仍屬兇悍勝保督兵已逾三月尙未能堵穴擒渠自問於心能無愧乎總之朕惟以剿滅賊匪爲憑豈徒虛言所能了事耶見在已屆新歲勢難再寬時日著卽乘機進剿迅殄賊氛無得再事遷延致干重罪將此由六百里加緊諭令知之○諭袁甲三奏賊陷廬州請急圖克復一摺自廬郡失守疊次諭令和春督兵進剿並令其總統諸軍俾

事權歸一以專責成據袁甲三奏廬州城內米糧尙足火藥缺乏正可乘逆匪守禦未備力圖克復不可專待薩炳阿奏定三之兵遷延時日致該逆又成負隅之勢總兵郝光甲楊青鶴皆係舒興阿軍營帶兵之員如果不知奮勉著和春卽據實嚴參江忠源爲國捐軀每一念及不勝悼惜其弟江忠濟江忠濬隨同江忠源管帶楚勇屢著勞績一門忠勇實屬可嘉著和春卽將本日所降恩旨傳知該員等加以激勵俾令仍帶兵勇隨同該提督剿賊若能始終出力不難優與恩施福濟見授安徽巡撫責無旁貸務卽帶兵前往與和春合力勦辦毋得僅以道塗阻滯供應缺乏藉詞不進致誤事機臨淮關一帶卽責成刑部郎中李文安督帶兵勇實力防剿其長淮衛十里城沫河口老鶴河等處應否撥兵堵禦著和春迅籌布置以杜逆匪北竄之路和春身爲統帥務與福濟激

勵兵勇迅速進剿毋稍延誤其河南陳州與皖省連界等處捻匪已諭英桂飭令徐廣縉牛鑑相機剿辦矣將此由六百里加緊各諭令知之○諭本日據袁甲三奏請令會國藩督帶兵勇船礮由九江直赴安徽安慶刻下賊數無多或先克復安慶亦可斷賊歸路等語廬州爲南北要衝見在爲賊所據必須乘其喘息未定趕緊進剿遏賊紛竄之路會國藩製辦礮船並所募楚勇數千人此時諒已齊備著卽遵前旨迅速由長江駛赴安徽會同和春福濟水陸並進南北夾攻迅殄賊氛以慰廑念將此由六百里加緊諭令知之○袁甲三奏西路捻匪前因臣移營宿州二百里外該匪復圖嘯聚當經飭派文武督帶兵勇往剿嗣據參將朱連泰等稟報該匪巢穴均在亳州之義門集一帶先因查拏緊嚴匪黨多已聞風解散其未散者在楊家塘等處百餘里內統計官兵接仗八

次除該匪自相踐踏不計外共格殺轟斃三百餘名生擒擒首擒夥葛豹馬長德等二百三十五名並經委員知縣顧思堯在德寺一帶督飭各鄉團練拏獲正法者二百十二名見因廬郡告陷宿州喫緊臣回宿後將徐曉峯等所帶兵勇三百餘名暫行撤回仍畱顧思堯帶兵四十名督團搜捕惟潁郡西南鄉與豫省交界地方擒首李士林糾合多股勢頗猖獗見據該紳民疊次來宿籲求而時勢所迫不能分身前往應請飭令河南巡撫速飭附近文武酌帶兵勇越境捕剿免致蔓延其在逃勇目李三關卽李興青本係泗州人疊犯重案屢拏未獲本年春間帶數百人逃往揚州投充鄉勇打仗出力已保守備見自揚營潰逃於靈泗交界之高家集仍以招勇爲名已聚二三千人又於村外修築土城蹤迹叵測人心頗爲驚惶見已派臧紆青會同靈璧縣酌帶兵勇前往以查

拏別案爲名密遣偵探入其巢穴設法殲擒 上諭前有旨令牛鑑馳赴陳州等處與徐廣縉勦捕擒匪見在廬郡失陷皖省軍務正當喫緊之時而潁州擒首李士林糾合多股勢甚猖獗袁甲三已移營宿州潁州西南鄉與豫省交界地方距宿州四百餘里計程較遠自應就近由河南派員督辦免致蔓延著英桂卽飭牛鑑徐廣縉酌帶兵勇越境掩捕無分畛域以期迅速翦除勿令勾結爲患其河南防堵事宜卽著英桂督率將弁並地方官實力防範不得稍有疏虞致干罪戾將此由六百里諭令知之○諭前因舒興阿奏軍餉將次用竣諭令張祥河迅速籌款解赴軍營諒已遵照辦理見在廬郡失守正當軍務喫緊之時需餉浩繁儻有缺乏所關非細著王慶雲仍遵前旨督同藩司迅卽籌撥銀十萬兩派委幹員解赴和春軍營應用並著該撫寬爲籌備源源接濟無誤

要需將此由六百里加緊諭令知之○僧格林沁奏賊撲王家口如探有北犯確信卽至固安截剿得旨前路逆情隨時探聽仍應會剿爲是見在西面雖有竄出之賊尙有伊勒東阿等儘敷防剿汝可速定進止於接奉批回摺卽行覆奏○實授易棠陝甘總督○癸卯僧格林沁奏據副將史榮椿等稟報探得賈口村南張家莊一帶賊匪出沒隨卽列隊堵截加意嚴防本月初一日突見獨流賊匪撲出三四千人該副將等帶兵迎擊開放大礮該逆渡冰拒敵我兵奮勇攻擊斃賊三百餘名餘匪退回獨流又據駐紮王家口之副都統那敷德呈報竄出逆匪見今占踞東河頭梁頭等莊該副都統嚴兵以待該逆並未出撲臣思此時逆匪向西奔竄惟有分布各營迎頭關擊以杜潰竄至節次打仗出力官兵容俟查明保獎其賈口村民同深敵愾業經撥銀犒賞上諭軍機大

臣等前有旨令僧格林沁統帶馬步各隊移營前進與勝保合爲一軍昨據該大臣奏靜海逆匪意圖西竄擬仍由武清橫至固安攔前截剿已於摺內批示矣見在西路本有伊勒東阿所帶官兵儘敷防剿本日復命布彥泰馳往王慶坨後路之防愈形周密僧格林沁卽當迅速移營親赴前敵不得再有耽延推諉該大臣帶兵出京已及四月初時原爲勝保一軍足敷剿辦是以准其駐紮以障京師以見在情形而論非合力攻剿不能迅速殄滅若徒株守一隅何時蕝事著僧格林沁於接奉此旨後刻卽前進其北面防堵事宜卽交布彥泰督辦並將如何會剿情形迅速據實覆奏逆賊負嵎已久萬不能再任稽誅該大臣若稍事遷延貽誤之罪不獨勝保一人當之也將此由六百里加緊諭令知之○諭前因廬郡賊勢猖獗節經諭令向榮將和春原帶之湖南親兵七百名

飭令鄭魁士統帶赴皖復派秦定三管帶得力兵丁一二千名星馳赴援廬州關繫北路要衝若不迅圖剿滅於大局更不可問見在調到之兵半多未經戰陣恐出敵不能應手必致貽誤軍情著向榮懷遵前旨即將湖南官兵並前調湖南得力之兵派委鄭魁士秦定三迅速管帶起程交和春調遣以資攻剿不准率行請畱致有延誤其金陵鎮江應如何力籌堵剿之處仍著向榮周密布置及早攻克不得以分兵藉口稍涉疏虞致干重罪將此由六百里加緊諭令知之○諭據向榮奏請調廣東水師挖罟快蟹各船並水師得力員弁兼籌借餉等語此事屢經降旨飭調該督撫屢次奏覆總以窒礙爲詞然向榮前在廣西目擊剿辦艇匪及見詢在營兩粵官弁均以粵東水師船隻爲得力且內外臣工條奏所見畧同江南賊匪騷擾經年患在腹心豈可再事延緩若以經費

支絀畏難不辦或心存畛域藉詞堅拒該督撫素日辦事尙屬認真不當如是著葉名琛柏貴按照向榮所奏悉心體察迅卽選調外海水師挖罟船五十隻檄調副將梁顯揚等分起管帶剋日出洋速赴江南並飭屬趕緊招募快蟹船五十隻雇齊水勇隨同挖罟前往相輔協剿仍遵前旨諄勸伍崇曜龍元禧蘇廷魁或專任集捐趕辦或專司統領開行務期事在必行無任藉詞推諉儻能同心協力將大江賊艇與該省陸路各軍迅速會剿全數掃除則破格酬庸朕所不吝其福建截畱駛回廣東修整之紅單船隻亦著查明趕緊修理完竣仍飭令陳國泰吳全美等管帶船礮由海路駛赴大江與此次選調各船一併前往協剿可望速殲醜類其調赴楚北之兵丁礮匠人等諒早已前往想曾國藩可以帶赴安徽足資攻剿至頒給官票酌借軍餉一節並著妥籌酌辦該督撫

接奉此旨迅將辦理情形先行馳奏以慰朕念向榮片著鈔給閱
看將此由六百里諭令知之○步軍統領聯順等奏郭興案內疏
忽之參將李長清等請摘頂帶得旨此案已隔多日何至今年始
行參奏況南營將弁例不准擅入天壇是否另有別情藉端參
處著明白回奏候旨行○曾國藩奏臣前覆陳赴皖援剿情形仰
蒙訓諭周詳惟見辦情形與臣之愚見尙恐聖明有未盡知不
得不詳細陳明臣啟行之期未能遽定前派張敬修赴廣東購礮
千餘尊分爲十起解楚雖頭起業經到衡後九起尙無信息臣所
辦戰船新造者九十號改造者百餘號合之雇載者共四百號正
月中旬當可完畢惟礮位至少亦須八百尊俟稍敷配用方能啟
程黃州以下節節有賊水陸往援之兵不能遽達皖境臣前兩奉
接鄂之旨命臣籌備船礮肅清江面後兩奉援皖之旨命臣駛入

大江順流東下直赴安徽見在黃州以下被賊占踞已成負嵎之勢若舟師東下必須克復黃州攻破巴河埽清數百里江面賊船乃克達於皖境萬一黃州巴河之賊堅守抗拒則臣之到皖無期

安徽待援甚急前劉長佑帶楚勇千餘名自湖北前往江忠濬帶

勇一千名又有滇兵一千名均自湖南陸續前往計湘省援皖之

兵已三千餘矣臣奉命由水路前往中有阻隔恐難埽蕩而前而

統籌大局正宜堵截江面攻散賊船以保武昌臣查本年兩次賊

舟上竄湖南防堵耗費甚多湖北江西亦各耗費數十萬三省合

力防堵之說係江忠源與臣函內言之待南省船礮到鄂卽與北

省水師合力進剿係吳文鎔與臣函內言之是以臣前摺內聲敘

茲奉到訓諭臣自度才力實屬不能而江忠源等之言臣以爲皆

係切要之務該逆占踞黃州巴河一路其意常在窺伺武昌論目

前之警報則廬州爲然眉之急論天下之大局則武昌爲必爭之地何也能保武昌則能扼金陵之上游能固荆襄之門戶乃能通兩廣四川之餉道若武昌不保恐成割據之勢爲今之計宜先合兩湖之兵力水陸並進以剿爲堵不使賊舟回竄武昌乃爲決不可易之策若攻剿得手能將黃州巴河之賊逐漸驅除步步進逼直至湖口之下小孤之間與江西安徽四省合防則南服猶可支撐臣之才力固不能勝臣之見解亦不及此此係吳文鎔駱秉章江忠源之議論然舍此別無良策臣此次東下擬幫同吳文鎔照此辦理至臣所練之勇剿辦郴桂土匪不能遽行撤回自駐紮衡州以來本處土匪竄撲常甯藍山等縣城盤踞道州之四菴橋經臣派勇隨處攻剿先後撲滅復有一股竄入永興縣城亦經派勇往剿計臣勇在桂屬者千餘人在郴屬者八百人昨奉諭旨令臣

督帶船勇速赴安徽常甯土匪責成駱秉章妥辦自應欽遵辦理
惟桂屬正在接捕未便遽行更換郴州永興情形危急不能不星
速進剿擬待船礮辦齊再將各勇撤回帶赴下游不至誤事臣以
丁憂人員奏明不願出省辦事乃疊奉明旨飭令東征止以大局
糜爛非臣子所敢避謝之時然攻剿之事實無勝算賊勢猖獗如
此豈臣區區所能奏效茲奉批諭臣自維才智淺薄惟有愚誠不
敢避死而已至於成敗利鈍一無可恃若遽責臣以成效則臣惶
悚無地與其將來毫無樹立受大言欺君之罪不如此時據實
陳明受畏憚不前之咎臣既不能在籍終制貽譏士林若復以大
言僨事貽笑天下臣亦何顏自立於天地閒乎伏乞聖慈憐臣
進退兩難誠臣以敬慎不遽責臣以速效自當殫竭血誠斷不敢
妄自矜詡得旨成敗利鈍固不可逆睹然汝之心可質天曰非獨

朕知若甘受畏憚之罪殊屬非是又奏衡永桂陽股匪未淨情形得旨汝以在籍人員能如是出力已屬可嘉著知會撫臣勦辦或有汝素來深信之紳士酌保辦理亦可又奏請嚴禁衡清二縣保甲收餉弊端又批此應亟更易者著知照駱秉章將改辦章程速行覆奏○向榮奏勦賊獲勝請飭琦善派馬隊一千名並調廣東挖罟等船至江南助勦得旨一派鋪張並非真能得手汝自廣西追賊至江南徒費多兵未見有尺寸之功尙何面目撥江北之兵斷不准行汝必要撥江北之兵可將汝首送來又批籌畫尙周恐未能盡如所請又奏請飭令劉開泰仍赴安徽壽春鎮總兵任署總兵金玉貴因打仗箭傷請加副將銜仍畱營調遣又批金玉貴著賞副將銜俟傷痊後卽赴署任不准畱營劉開泰已授南贛鎮所請仍赴壽春著不准行汝係欽差大臣專司軍務汝營中將弁

特旨簡放何得擅留況江南地方非汝所轄殊屬多事○和春奏
皖省賊勢益張請飭向榮撥兵至江北會剿得旨所籌俱是汝身
經百戰自能洞悉逆情著奮勉力圖滅賊速膺懋賞已有旨諭向
榮矣○命正白旗漢軍副都統布彥泰馳赴王慶坨軍營○甲辰
諭軍機大臣等前據僧格林沁奏靜海賊匪竄撲王家口地方占
踞村莊數處本日復據勝保奏報情形大略相同是逆匪意圖西
竄王家口霸臺一帶最爲喫重雖經勝保抽撥官兵會同那敷德
堵剿仍恐兵力不敷僧格林沁所帶官兵本係扼賊北竄若此時
再不向前迎剿直待有北犯確信始行向西橫截已落後著見在
逆匪所踞多係零星村莊大兵一到即可殄除儻稍有遲延致逆
匪分布聯絡靜海大股潰圍突出勢更不可收拾僧格林沁自接
奉移營前進諭旨後連日奏報均不免藉詞推諉今軍情既有變

通自不必再往獨流卽著剋日帶兵徑赴王家口霸臺一帶盡力
攻勦務將賊踞村莊全數奪回使西北兩路均無可竄此係緊要
機宜亦卽可乘之機會僧格林沁若再有推諉則平日所籌皆係
虛詞竟是臨事畏葸大負朕之委任諒該大臣必不敢如是也此
時賊匪占踞村莊必當趕緊勦辦不容殘喘苟延免致又成負隅
之勢見在伊勒東阿等嚴防後路該大臣必當迅速前進斷不可
俟布彥泰到營再行前往致誤事機一切軍情務須與勝保和衷
商榷東北與西南雖分兩路仍無異合爲一軍不得稍存畛域有
誤大局將此由六百里諭令知之○諭據勝保奏逆匪勢欲西竄
見籌勦辦各摺片本日已諭知僧格林沁統領官軍移營王家口
嚴密堵勦該逆乘虛肆竄是其慣伎旣據奏稱王家口霸臺一帶
爲遏賊西竄之衝自應扼要堵截僧格林沁節經嚴旨催令迅赴

流闊形勢險要爲自江入皖緊要門戶前因防守無人賊得避實
擣虛陷鳳陽而趨豫省蔓延至今必須迅圖扼守以固藩籬惟臣
行營兵止四百名尙有一百名未到頃接和春來咨卽日進赴廬
州亦斷難畱兵分駐相應請旨飭下琦善等速撥精兵二千名赴
關山澗溪臨淮一帶堵禦防賊北竄 上諭前因廬州失守降旨
令琦善撥兵四千名向榮撥兵一二千名均歸和春調遣此時諒
已陸續起程合計和春統帶之兵爲數不少所有琦善軍營官兵
未便再行調撥見在賊踞廬州必須迅速殄滅則江北一帶可期
漸就肅清福濟著星速前往與和春合力進攻兵貴神速不得藉
口雨雪阻滯致誤事機並飛催琦善向榮嚴飭薩炳阿秦定三將
所調各兵迅速管帶赴和春軍營不可稍有稽遲該撫與和春務
當戮力同心迅殲醜類臨淮關一帶前有旨令刑部郎中李文安

督帶兵勇實力防剿關山等處著該撫酌量情形撥兵堵截以杜逆匪北竄之路另片奏經費支絀請仿照成案設局開捐並請將安徽江北各州縣錢糧畱抵軍需等語見在廬州待餉孔亟著卽照所議辦理該撫仍當督飭所屬撙節支發毋得稍有冒濫將此由六百里加緊諭令知之○撥內庫銀三十萬兩解赴欽差大臣勝保軍營以備軍需○丙午諭內閣刑部奏遵旨查明刊刻並未發鈔奏章人犯並將案內職官傳質明確請旨遵行一摺暫行革職之給事中吳廷溥著卽革職交刑部定擬罪名具奏給事中鳳寶等著該部仍遵前旨照例議處尋奏遵議吳廷溥發往新疆效力贖罪鳳寶等降一級畱任從之○丁未諭內閣上年冬至團圞大祀朕以偶患骭疾未能親詣行禮私衷正深乾惕茲屆祈穀大祀自應敬謹舉行虔申忱悃惟微疴尙未全除登降猶虞隕

越若再遣官恭代則大禮久曠朕心亦覺難安因命禮臣查照遣官分獻禮節及經由道路先期具奏原爲暫省繁文期於對越之時倍昭誠敬非敢輕改舊章著爲成例本日據宋晉奏請停新議仍遵成憲一摺是於朕權宜申敬之衷尙未深喻所有此次親行禮節仍著照該衙門所議行一俟朕躬履步如恆卽當照常將事大小臣工當知朕應天以實不以文之意也○吳文鎔奏臣因主事楊熙移營堵城臣必須徑紮松楊鋪聲勢方能聯絡當卽冒雪拔營前進及至松楊鋪察看地勢平衍雪深盈尺並無紮營之處卽督率將弁仍行前進直抵堵城雪勢更大卽駐紮楊熙營前上年十二月二十五日派都司劉富成等各帶兵練相機進剿行至距城數里之龍王山地方該逆分三路抗拒始則數十人一起前卻誘敵我兵占踞山梁嚴陣以待嗣有賊數千人分路撲來

我兵迎擊斃匪百餘名劉富成首先衝入賊隊手刃數賊賊卽敗退我兵因山路泥滑恐有埋伏仍紮駐山梁不動該匪等旋又分撲我兵由山梁壓下轟斃賊匪數十名割獲長髮首級十數顆賊復敗竄我兵知賊中有伏不便輕追中計正在整隊間該匪又復繞路反撲我兵分兩翼迎擊殺斃百餘名賊匪逃遁另股賊匪由江邊鈔襲我兵復分隊抵擊轟斃數名旋即敗回連日伏匿不出唐樹義水師因阻風尙未進至三江口擬俟雪霽風定仍相機約會進攻上諭前因湖北潰散餘匪下竄黃州一帶降旨諭令吳文鎔督兵追剿該督行抵黃岡縣境紮營堵城地方督同主事楊熙所帶川勇合力進攻大獲全勝著卽督率將弁兵勇乘勝進攻並嚴飭唐樹義督兵前進爲水陸夾擊之計毋任蔓延○僧格林沁奏帶兵赴王家口調回多爾濟那木凱防王慶坨得旨著傳旨

興培成嚴密防範勿稍疏忽見在東河頭地方尙爲賊踞確實情
形可卽行奏來○琦善奏查明瓜州等處大小賊船全回金陵擬
卽撥馬隊渡江助剿得旨向榮已奏請調兵過江朕因金陵餘賊
無多故嚴批謂汝要江北之兵可取汝首來今觀汝奏逆賊竄回
太多向榮營盤無虞衝突蘇常一帶甚爲可慮所撥馬隊若能設
法渡江固好究不若步兵爲宜可撥卽撥恐向榮奉有嚴批不敢
再調此次批諭著寄與向榮看又奏遵撥官兵三千名交薩炳阿
統帶赴皖並請飭部迅籌軍餉批續觀此奏馬隊已改撥安徽朕
料汝營光景步隊尤不克再行分撥旣難顧彼失此仍應嚴扼瓜
州杜其北竄是時惟盼靜海之賊速平則江安之逆無難削蕩所
有軍餉一節已飭戶部矣又奏潰勇傷害弁兵咨行地方官嚴懲
又批潰勇逃兵皆應嚴懲著通行江省各屬遇有此項滋事者一

概准其格殺勿論不徒弭患之益兼可激發隨營者上進之心又奏前因揚城勇潰賊係東竄慧成捏稱由南門竄出強顏諉過又批汝爲統帥咎無可辭慧成不肯爲汝下亦是實情至汝駁伊共分其咎一語是汝疑慮過甚總因從前汝未顧東路東路諸臣亦未籌及西面朕平心而論厥咎維均此數語可洞鑒汝之肺腑○戊申諭內閣工部右侍郎玉明和碩額駙恩醇每遇緊要差使輒先期藉詞請假今日又均以舊疾復發請假數日殊屬有意規避玉明著革去工部右侍郎恩醇著革去管理嚮導處事務並無庸署理鑲藍旗護軍統領以示薄懲○諭軍機大臣等前據和春奏與舒興阿面商分撥官兵舒興阿以官兵僅敷調遣爲詞再三婉商不肯允行旋據袁甲三將和春所致信件呈覽內稱舒興阿近在西路並不通信於十八日差人送文三件聲明八百里飛催該

提督前往倒填十五十六等日期是舒興阿與和春顯有意見不合本日據舒興阿奏則稱和春來營面商後卽赴店埠疊次備文移催迄未見覆嗣接該提督來咨又有將陝甘官兵畱於西面防守之語請飭該提督將所撥之兵調取統帶等語究竟該提督當時如何與舒興阿婉商舒興阿所稱令和春將兵帶來以便就近撥給官兵之說是何意見所稱疊次備文移催是否卽和春所指倒填月日之文和春旣謂兵單何以咨覆舒興阿文內又將陝甘官兵畱於西面是否因舒興阿前此不肯分撥遂不願調取舒興阿見奏所帶各路官兵共止六千餘名何以該提督前奏輒稱兵勇萬餘名均著和春詳細查明據實具奏見在舒興阿業已革職廬州各路援兵均歸和春調遣自不慮有掣肘著卽趕緊分撥進攻迅圖克復不得專待江南江北分調之兵致滋玩誤琦善昨奏

派薩炳阿帶馬步官兵三千名赴廬州協剿此時如未到皖亦著
飛催前進其北路防堵事宜卽與福濟袁甲三妥商籌辦毋稍疏
虞將此由六百里諭令知之○江西巡撫張芾奏賊擾饒州已革
通判王煊宇先期出城查點木植嗣後被擄罵賊遇害全家殉難
請開復予卹得旨王煊宇聞警先期出城追聞母病卽赴饒省視
責以有家而不顧國卽明正典刑尙不足蔽辜乃因爲賊所殺卽
裝點各情謂其罵賊不屈謂其因查木植不過爲袒護情面王煊
宇著不准開復原官亦無庸議給卹典其家屬及伊子著仍准其
議卹○調載齡爲工部右侍郎兼管錢法堂事務培成爲工部左
侍郎以伊勒東阿爲理藩院右侍郎由正白旗護軍統領遷○己酉諭內閣
奕興等奏團練緝捕請置備鳥槍等語民閒私藏鳥槍例禁綦嚴
惟見辦團練自應置備以資防守著照所請所有奉天團練緝捕

無論旗民均准其置備鳥槍並於槍上鑿字以備稽查造冊報明充爲公用遇有盜匪持械逞兇拒捕者卽用鳥槍轟擊依律格殺勿論該將軍等卽嚴飭地方官明白曉諭實力稽查如有挾嫌致斃良民及私藏不鑿字號鳥槍者仍照例治罪○諭軍機大臣等慧成奏營中存兵無多不能成隊請統帶調往廬州之原管熱河宣化徐州各營兵馳往安徽督同查文經等協剿一摺慧成自到揚州以來株守灣頭及至勇潰賊竄一籌莫展屢次報奏無非與琦善齟齬爭辯於軍情布置毫無實際茲又欲將撥往廬州之兵自行帶往仍係不歸琦善調遣意見有心取巧卽准令前赴廬州亦不過擁兵自衛於事何濟見在皖省諸軍統歸和春調遣原以一事權而肅軍律若再添派帶兵大員轉致掣肘貽誤慧成著不准前往安徽仍在揚子橋一帶力圖堵禦竄匪以贖前愆昨據琦

善奏酌撥馬步官兵三千名交薩炳阿帶往廬州惟薩炳阿前已
派赴六合見飭錫綸前往更換等語刻下皖省情形萬分緊急赴
援之兵勢不可緩著琦善卽飛催薩炳阿星速帶兵馳赴安徽毋
得稍有延誤慧成旣歸琦善調遣則江北一帶防剿均應責歸琦
善當此剿匪喫緊之際該大臣惟當激發天良督飭帶兵各員力
圖肅清江口若仍徂於積習各存意見冀圖洩憤以致再誤事機
朕必重治該大臣之罪不能盡歸罪於慧成如慧成等不聽調遣
朕亦必執法從事決不寬貸將此由五百里諭知琦善並傳諭慧
成知之○勝保奏密籌圍攻獨流靜海逆匪見已宣示各兵勇破
壘先登立予優獎得旨卽有一二人奮勇先登徒傷無益全局之
計至緊要也汝等妥辦毋俾再滋蔓延又覆奏礮位震傷因正在
禦敵未卽查驗請交部議處批此節亦不必議處汝總以剿盡逆

臣方爲不負朕委任若先自以爲不能取信則大誤也朕若疑汝何不撤回或殺之皆因汝先不自信故未能仰體朕衷又奏賊糧已盡見獲賊犯供稱靜海西邊有人運賣糧草豬雞等物請飭西路官兵認真巡緝斷賊接濟又批著知照僧格林沁嚴查懲辦雖東路未據供出亦難保其必無又奏那敷德會同桂齡等初三日進剿東河頭賊匪昭烏達兵格吉噶爾當先擊賊將賊殺退又批蒙古兵此次在軍營甚爲出力格吉噶爾尤屬奮勇著卽行保奏○庚戌諭內閣勝保等奏乘夜督兵攻克獨流餘匪潰竄一摺本月初八日勝保督率各路兵勇進攻逆匪於亥刻直抵獨流木壘越壕而進兵勇踊躍先登守壘之賊俱被擊斃大兵隨後齊進開放槍礮直向賊巢轟擊燒毀木壘該逆猶復拌死抗拒我兵斃賊無數奪獲鳥槍擡槍旗幟百餘件贏馬數十匹又將街內各處藏

匿之賊按殺二百餘名餘匪紛紛奔竄該大臣見派魁福帶領馬隊跟蹤追剿又派天津西甯正定步隊隨後繼進見在王家口一路有瑞昌帶兵堵禦青縣唐官屯一帶有明慶崇恩帶領馬步官兵扼守苑家口一帶有瑞麟慶祺督兵堵截又有西凌阿善祿帶領馬隊追擊著該大臣等督飭各路官兵四面兜剿迅掃賊氛毋令紛竄○諭軍機大臣等勝保奏獨流逆匪向西南奔竄督兵追剿等情一摺覽奏曷勝憤懣逆匪占踞獨流以來屢次諭令該大臣嚴密堵截無任竄逸以期聚而殲旃卽該大臣屢次奏報亦云賊勢窮蹙已極且布置周密賊匪無路可竄朕日望捷音以爲剋期必能掃蕩乃本日據奏獨流逆匪於初八日夜向西南奔竄或奔靜海或奔河西尙未可定等語是獨流之賊全股竄出且並不知逃往何處比及偵探明確派兵剿擊而賊蹤已遠又成尾追之

勢該大臣統領大兵數萬有餘布置數月之久乃竟任令久困餘匪奔突而出儻復占踞要隘賊勢益張近畿一帶生民又遭荼毒該大臣等自問當得何罪另片奏子牙鎮爲糧米所聚僧格林沁咨令瑞昌紮營王家口以南等語本日已諭令僧格林沁卽折回王慶坨防堵仍將所帶之兵一千餘名歸勝保統帶如僧格林沁未赴王家口卽著勝保將此項官兵飛調前來以資攻剿所有瑞昌那敷德史榮椿等所帶之兵均歸勝保調遣如僧格林沁不肯將各官兵交付卽著勝保傳旨飛調仍一面據實參奏如帶兵各員不聽調度並著嚴參治罪勝保身爲統帥旣經貽誤於前已屬罪無可逭德勒克色楞及西凌阿善祿等俱係幫辦之員均難辭罪趁此賊匪狂奔喘息未定前截後追正可殄滅無餘儻再失機會致令餘匪復肆鴟張或竄踞他處負隅固守朕必將勝保等一

併從重治罪見在僧格林沁所帶官兵添撥勝保軍營已嚴飭僧格林沁不得掣肘該大臣統領重兵事權既已歸一防剿均難卸責若不迅殄賊氛更有何顏對朕耶將此由六百里加緊諭知勝保並諭德勒克色楞西凌阿善祿知之○諭前因靜海逆匪竄撲東河頭等處地方諭令僧格林沁帶兵竟赴王家口霸臺一帶攻剿昨據勝保奏該大臣於初六日至王家口而僧格林沁並未奏報本日據勝保等奏督兵攻克獨流逆匪向西南潰竄又稱賊踞東河頭直通子牙鎮該處西通大城南通青縣勝保於初六日已令瑞昌馳往堵剿初九日接僧格林沁咨令瑞昌紮營王家口以南不必往子牙鎮各等語官兵克復獨流逆匪紛竄西南一帶尙無定局子牙鎮爲糧米所聚若竄踞該處又成負隅之勢剿辦更難得手勝保既令瑞昌帶兵前往堵剿何以僧格林沁竟行截留

遲至三日始行咨明勝保實屬不知緩急該大臣與勝保共辦一事當此軍情萬分喫緊自應合力同心統籌全局豈可堅執意見致令掣肘就目下賊情而論王慶坨乃係西北要隘布彥泰病尙未痊一時尙難前往著僧格林沁卽行折回王慶坨探賊所向實力堵剿所有瑞昌那敷德史榮椿及僧格林沁帶赴王家口各官兵均著交勝保調遣以備攻剿如僧格林沁此時尙未赴王家口亦卽將前此奏明帶往之兵一千餘名迅交勝保調撥毋許擅留再有貽誤至培成伊勒東阿所帶官兵仍歸僧格林沁統帶逆匪潰竄志在狂奔務當偵探明確相機堵剿兵貴神速最忌牽制該大臣屢奉諭旨遲回不決已失事機若再有延誤恐不能當此重罪也將此由六百里加緊諭令知之○諭本日據勝保奏乘夜攻剿獨流焚燒木壘殺賊千餘名賊匪奔竄並占踞東河頭地方且

通子牙鎮該處西通大城南通青縣爲王家口唇齒等語見在逆匪意圖奔突賊蹤靡定已飭令勝保督帶各路官兵前截後追靜海西南一路最關緊要著桂良速派得力將弁於各處要隘嚴加防守並探明賊蹤扼要堵截萬不可令該逆再踞要隘地方致成負隅之勢剿辦更難得手該督務當熟籌緩急嚴密布置毋誤事機將此由六百里加緊諭令知之○貴州學政黃統奏訪獲私雕學政關防人犯訊稱夥犯未獲勢必隨棚招搖汚臣名節得旨著知照蔣蔚遠從嚴懲辦又批即使該犯撞騙得財事後必能破獲於汝名節何干汝以欽命官與該犯較量錙銖殊覺見識未廣朕以小事觀之汝止知顧一己之名亦屬習氣太重嗣後務須存大識見○辛亥祈穀於上帝○諭內閣王懿德奏閩省營務廢弛情形一摺福建地處海疆額設水陸各營除每年赴臺換防外內

地存兵數逾四萬有奇如果統兵將弁平日認真練閱嚴覈虛伍
慎重操防卽偶遇地方有警足資捍禦乃近日漳泉各屬竟有富
家子弟賄買名糧一遇徵調半係頂雇當差積習相沿殊堪痛恨
至水師巡洋捕盜所修戰艦豈容不肖營員偷減工料見在該省
土會各匪經王懿德督兵剿辦漸就肅清所有水陸各營從前積
弊亟應力圖整頓著王懿德會同署總督有鳳督飭將弁各官破
除情面實力整飭如有前項弊端一經查出卽將該管官從嚴參
辦毋稍寬縱○壬子諭內閣吏部奏遵旨議處一摺江西巡撫張
芾陳奏截畱銀兩濫保員弁率多任意妄行其守城兵餉亦多冒
濫朕於摺內批示加之訓誨原係成全造就之意乃張芾負氣逞
詞嘵嘵置辯並於另片奏稱疑尙書陳孚恩有不合朕心之處力
陳該尙書小心謙謹守城時積勞成疾忽奉嚴旨若非言官糾彈

卽係大臣挾嫌攻訐等語尤屬可笑賞罰之權操之自上朕獎功黜罪一秉大公無論言官糾劾總須察有實據分別示懲從未嘗以風聞影響之詞遽加罪戾卽左右大臣如有挾嫌攻訐之事亦豈能逃朕洞鑒陳孚恩守城出力業經賞戴花翎伊子陳景謨亦賞戴藍翎並未沒其微勞何至紳士等羣情渙散如張芾所云也張芾身任封圻敢以私意揣測朕衷實屬膽大糊塗不堪造就著照部議卽行革職○諭軍機大臣等據奉命大將軍惠親王並恭親王奕訢將勝保德勒克色楞瑞麟信函二件呈覽知靜海獨流逆匪全股西竄僧格林沁已馳抵大城與賊接仗勝保疾趨霸州扼其北竄該大臣等奉旨勦賊日久無功致令乘虛奔突卽將該大臣等以軍法從事亦不足惜惟畿輔近地事機緊急該大臣等果稍有天良必當趁該逆奔竄未定之時盡力堵禦迅速勦除以

贖罪戾見已諭知僧格林沁卽由文安大城一帶督兵截擊不得令該逆更向西南紛擾尤不可任令北竄勝保意在由北而南分途截剿徑赴霸州但自大城而西北尙隔保定任邱等縣及東西淀會同河若令過河而西將更不可收拾本日已命大將軍等將東路三營移紮東安固安涿州爲黃村前敵著德勒克色楞於奉到諭旨卽行揀帶精銳官兵一千名兼程馳往固安駐紮防守所有黃村東安固安涿州通州盧溝橋等處官兵統歸德勒克色楞節制其餘該貝子所帶各兵統交瑞麟管帶隨同勝保前往迎剿該大臣可以無須兼顧北路卽刻督兵南向扼賊北竄極力截殺與僧格林沁隨時知照爲夾擊之計萬不許令該逆再有占踞地方或竟敢窺伺保定省垣該處爲京師屏蔽財物充阜尤不可稍有疏虞勝保當探明賊蹤迅督各路官軍層層布置迎擊兜剿不

得更以積冰積水爲詞稍事迂緩仍與僧格林沁德勒克色楞西
凌阿善祿桂良時相知照密籌防禦該大臣等負罪已深此時暫
勿加譴若再不將該逆悉數埽除但有一處蔓延必將該大臣等
就地正法勿謂寬典可冀倖邀也仍將進兵機宜及賊情如何星
速由驛馳奏軍情緊急一切奏報不必拘泥繕寫楷書總以據實
迅奏爲要將此由六百里加緊諭知勝保德勒克色楞並諭西凌
阿善祿瑞麟知之○諭前因僧格林沁會否已至王家口未據奏
報特降諭旨令其折回王慶坨以防西北要隘本日據奉命大將
軍惠親王等奏接到勝保等來函並探報情形僧格林沁已在大
城地方與賊接仗殲斃逆匪數百名是該大臣已追賊南下事機
緊要若仍拘泥諭旨遽行折回恐逆匪竟奔西南保定一帶又被
滋擾僧格林沁卽行追趕不可使該逆稍畱喘息之地勝保因恐

驅賊北上已帶兵馳赴霸州爲迎頭邀截之計本日亦諭令迅速由北而南迎頭截擊其北面各路已於涿州固安東安三處及後路之黃村節節布置已有兵五六千名並令德勒克色楞暫回固安調度北路諸軍該大臣等可無後顧之憂總以盡力追殺爲要無恤其他勝保不能嚴密防範僧格林沁屢次遲回不進以致逆匪紛竄若按軍律治罪該大臣等均無可辭若再不痛加勦洗稍贖前愆自問數月以來老師糜餉更有何面目對朕耶直隸保定省城爲京師屏蔽防守甚關緊要昨據桂良奏唐官屯苑家口等處皆止官兵百餘名勝保所奏續派明慶瑞昌瑞麟慶祺等分堵之兵未知到否即使趕到已落賊後儻保定稍有疏失朕惟僧格林沁勝保是問連日接仗如何情形卽著迅速具奏軍情緊要一切奏報不必拘泥繕寫楷書總以迅速具奏爲要毋稍遲延貽誤

將此由六百里加緊諭令知之○以陳啟邁爲江西巡撫調麟桂

爲江蘇布政使以韓椿爲浙江布政使

由福建按察使遷

○癸丑僧格林

沁奏臣遵旨移營於初六日馳抵王家口初九日該逆全股撲向

西南逃竄臣飛督拉木棍布札布綳闊那敷德帶領馬隊官兵一

千餘名跟蹤追至子牙鎮迤南奮勇擊殺計自子牙鎮至張家莊

六十餘里賊屍枕藉約斃長髮賊一千餘名生擒六十七名初十

日丑刻仍督兵追擊該逆沿路拋棄衣服意在我兵檢拾以便脫

逃當傳飭各兵如有拾取物件者以軍法從事一面督飭痛加剿

洗該逆後隊約有六七百名全數殄滅並殺斃賊目四名適西凌

阿等帶領吉林黑龍江馬隊趕到卽令合爲一軍向前追殺復又

斃賊三四百名該逆竄入束城村向外施放槍礮維時已交亥刻

傳令撤隊十一日我軍分五路進兵以一路擊其中隊以兩路擊

其左右其餘兩路以防該逆鈔襲該逆見我兵嚴整仍退入村內
臣未能攜帶大礮難以轟擊逆匪雖不兇猛而狡猾異常臣所帶
馬隊僅三千餘名不敢遽行攻撲惟有嚴防北面一俟後路官兵
到時合力夾擊並飛咨勝保派兵援應及轉行培成多爾濟那木
凱速往河閒保定迎截上諭內閣僧格林沁奏連日督兵追剿
逆匪大獲勝仗一摺逆匪屢經我兵攻剿窮蹙全數潰圍逃竄僧
格林沁督帶馬隊官兵沿途追擊斃賊二千餘名剿捕尙爲迅速
著該大臣督飭各路大兵趕緊兜圍並著勝保統帶馬步各隊飛
速前進合力夾擊務期盡殲醜類毋令竄逸○諭毓通奏霍碩特
正盟長貝子多爾濟那木扎勒等捐備軍需呈請轉奏請旨一摺
霍碩特正盟長貝子多爾濟那木扎勒副盟長扎薩克頭等台吉
棍齊克扎普扎薩克頭等台吉拉什德勒克聞軍務未竣情願各

捐銀一千兩衷悃出於至誠深堪嘉尚惟該貝子等此項銀兩借資生計著毓通轉行曉諭多爾濟那木扎勒等所捐銀兩著毋庸賞收以示朕矜恤蒙古之至意○諭前因揚州賊匪竄突東路鄉勇潰散職員張翊國帶兵防禦不能固守業經降旨將該革員發往新疆充當苦差復經雷以誠奏稱張翊國曾在施家橋擊賊獲勝當交琦善確查具奏茲據該大臣查明張翊國自勇潰之後並未與賊接仗著仍遵前旨將張翊國發往新疆充當苦差○諭軍機大臣等僧格林沁奏督兵追剿賊匪連次大獲勝仗一摺獨流逆匪全股向西南逃竄經該大臣督帶馬隊連日跟追先後殲擒賊匪二千餘名僧格林沁初次與賊接仗卽能激勵將士痛加剿洗且跟蹤緊追行走迅速尙屬可嘉見在逆匪竄踞東城村西凌阿等所帶馬隊均已趕到僧格林沁見帶馬隊三千餘名在東城

村外屯紮正可乘其喘息未定盡力攻擊並嚴飭各路弁兵認真
堵截毋令再有竄逸勝保統領大兵由北而南見在行抵何處並
未據奏報兵貴神速見當追剿喫緊之際豈得再有遲誤勝保前
在山西追賊甚爲迅速此次何以藉按捕餘匪冰水難行爲詞至
今尙未趕到豈以追賊之事竟諉之僧格林沁耶北路一帶昨已
諭令德勒克色楞帶兵一千名馳往固安所有黃村等處官兵統
歸節制僧格林沁勝保此時總以合力夾擊迅殲逋寇爲要若因
北路牽制攻剿轉難得力著卽督兵迅速前進併力兜圍斷不准
任令賊匪占踞鄉村擾撲城邑又成負隅之勢僧格林沁與勝保
督兵數月攻剿旣未得手防範又有疏虞致賊竄逸已屬罪無可
道若再不同心協力迅殄賊氛自問當得何罪前撥內庫銀三十
萬兩已分別解赴兩處軍營著該大臣等分飭糧臺派委委員迅

速迎提毋稍疏失將此由六百里加緊各諭令知之○諭本日據王履謙奏豫省吏治廢弛軍需浮冒河工糜費一摺據稱豫省州縣紛紛調署公事廢弛甚至規避處分調濟屬員五月間汴梁被圍藩庫存銀三十餘萬兩幾爲一空懷慶解圍後辦理防守事宜支發不及二萬稟報至八萬餘兩之多前署河南府知府李潔官聲本屬平常借防堵爲名擅動發商生息銀兩至河工錢糧東河每年不下一百四五十萬兩實在辦工不及十分之六任情揮霍種種糜費各等語見在防堵喫緊之際各州縣豈容任意調署無所專責其支發各款豈可浮濫報銷至數倍之多著英桂飭令藩司鄭敦謹逐款句稽據實查辦並將浮冒各員嚴行參處其河工歲料著長臻詳細查明應如何革除浮費俾錢糧皆歸實用安定章程具奏原摺著摘鈔閱看將此由五百里各諭令知之○諭修

天壇牆基○以徐宗幹爲福建按察使

由臺灣道遷

○甲寅諭內閣

宋晉奏瀝陳因循積習難挽請愼行賞罰一摺朕自御極以來兢兢業業四載於茲當此國計艱難民生彫敝未嘗不深宮循省寢饋難安上年特頒手詔力戒因循原期中外臣工力除積習用副朕勤求治理之心若徒事虛文日申詰誡究於實政何裨自逆匪肆擾統兵僨事各員失律喪師均屬罪無可逭或立予重懲或由部臣定擬情節既有不同罪名豈能一致朕賞功罰罪權衡輕重一秉大公卽如守城出力各員無不立沛恩施或諸臣不能承受朕恩自招罪戾亦不得因其出力在先概從寬宥總之各部院大臣陳奏事件必期確有實際俾可見諸施行若徒以空言一奏爲沽名市譽之地亦難逃朕鑒也○諭前有旨令德勒克色楞揀帶精銳官兵一千名在固安一帶防守見在德勒克色楞已同勝保

統帶大兵兜剿逆匪著改派載齡馳赴固安駐紮統帶固安東安黃村涿州通州蘆溝橋等處官兵各路帶兵大員均歸調遣○僧格林沁奏逆匪蟻聚河間所屬束城村並將附近之桃園西成二小村屯踞以爲犄角臣因兵力太單兼之官兵於冰雪之中目不交睫者數日未免勞苦是以亟盼勝保慶祺等策應此時若操之過急一經四潰則散漫無制若竟不乘勢攻打又恐該逆得以休息刻已飛催勝保等速來及時合圍痛剿即可聚而殲旃並請密飭直隸山東各省一體防截各固疆圉以免疏虞 上諭軍機大臣等前因逆匪全股西竄諭令德勒克色楞帶兵一千名馳往固安駐紮以防北路本日據勝保德勒克色楞奏已於十二日馳赴任邱先帶馬隊前往軍營與僧格林沁會商剿辦等語見在賊踞米家莊束城一帶任邱去該處甚近正可乘機剋期進剿德勒克

色楞著毋庸折回固安卽與勝保統帶各兵趕赴前敵會同僧格林沁併力圍剿其後路未到之兵均著嚴提前進不准藉詞逗畱至北路一帶本日已命載齡前赴固安所有黃村等處官兵統歸調遣該大臣等著卽懷遵疊次諭旨同心協力四面兜剿迅殄賊氛斷不准再令竄逆滋擾其慶祺瑞齡所帶之兵或暫畱任邱防守或調赴前營均著該大臣等相機調度總之軍情變幻靡常惟在臨時酌度緩急隨機應變切不可有用之兵置之無用之地將此由六百里加緊各諭令知之○諭福濟奏安徽徵收錢糧請暫行變通一摺據稱皖省廬鳳潁所屬州縣去年下忙地丁分釐未解緣鳳陽等處率以制錢一千八九百文作銀一兩近來銀價日昂不敷報解一議加增人情惶駭且自賊匪滋擾小民流離遷徙實有未能盡徵之勢請將完善之區本年上忙新賦准交制錢

二千作銀一兩暫行變通等語地方應納錢糧向有定例原不可輕易更張該撫所奏體恤民情兼可接濟軍餉是一時權宜之計卽著照所議辦理若元氣稍復仍著按照舊章徵收不得援以爲例將此由六百里諭令知之○諭昨據僧格林沁奏獨流等處賊匪全股潰圍逃竄連日督兵追擊大獲勝仗該逆竄入東城村見在進兵追擊本日據勝保奏十二日馳抵任邱探知該逆竄踞米家莊東城一帶卽日帶兵前進與僧格林沁合力兜剿各等語逆匪利在狂奔且聲東擊西是其慣技見雖竄往西南仍去天津不遠著文謙督飭分守各路兵勇揔捕餘匪嚴密防守毋得稍有鬆懈靜海獨流各村莊業已收復該處百姓慘遭荼毒蕩產破家深堪憫惻著卽督飭地方官妥爲安撫毋令一夫失所並嚴催張起鵬迅速隨營支應糧臺前由京解往餉銀妥慎收撥毋稍疏忽○

乙卯諭軍機大臣等見在靜海獨流賊匪全股竄出屯聚河間所屬之束城村經僧格林沁疊次斬擒大獲勝仗勝保等亦由任邱督兵前進會同剿辦該逆情形窮蹙難保不分投四竄西南兩路雖經派兵堵截惟該逆聲東擊西是其慣技河間接壤山東德州尤爲喫重其河南之武安涉縣與山西之黎城潞城等處爲該逆入直來路尤當先籌防範其山東臨清上下毗連直隸處所尤防零匪竄入豫省之河北各縣與山西之東北凡有鄰近直隸各要隘均宜一體設防著張亮基恆春英桂督飭文武員弁嚴密巡查實力堵禦毋許匪蹤闖入張亮基駐紮德州尤當激勵將士申明紀律勤加偵探與僧格林沁勝保大營聯絡聲勢隨時知照一切靜海獨流雖已收復東路武定一帶仍須密飭防範不可稍涉大意將此由六百里各諭令知之○向榮奏遵旨籌撥官兵馳應院

北並江南防剿情形得旨汝在江南日久無功不思設法剿洗乃率請飭赴江北明係兵力較單可以誘過於人殊屬無恥○丙辰諭內閣戶部奏議籌浙江海運章程一摺本年浙江省辦理海運改由劉河口受兌一切經理事宜業經浙江巡撫黃宗漢派員妥辦惟該處海口係江蘇所轄若專令浙江委員催辦尙恐呼應不靈致有貽誤著怡良許乃釗立即派委大員並熟諳海運之員駐紮劉河會同浙江委員設局安速籌辦不得稍分畛域至海船駛抵天津以後應用剝船著桂良督飭天津道府寬爲豫備以濟剝運其江蘇省海運事宜仍著該督撫迅籌具奏毋許藉口軍務因循延宕致誤正供○湖南巡撫駱秉章奏遵查咸豐二年七月粵逆竄擾益陽知縣陳應台未能將河面船隻收至北岸以致潰匪搶渡竄屬失於防範請革職免議得旨陳應台不收船隻致令逆

匪得以搶渡罪無可寬乃駱秉章故意開脫並因所奉札文在後以爲非有意抗違試問卽無札飭船隻顧不必收耶逆賊竄擾數省雖非陳應台一人之罪但該犯身爲縣令事前旣疏於防範事後又捏稟回城救援規避情形已屬顯然駱秉章僅科以失盜從重例已革罷議不但謬妄已極實屬回護習氣太重駱秉章兩任湖南尙不知振作無恥已極況此案係前歲之事至去年臘月已逾一年又非命盜之案人證難齊不過故稽時日減緩該犯之罪料朕不咎旣往含混批交部議有意取巧尤堪痛恨駱秉章著交部議處陳應台著刑部從嚴定罪具奏尋奏陳應台從重發往新疆效力贖罪從之又奏駱秉章請照溺職例革職得旨駱秉章著改爲降五級畱任不准抵銷○丁巳諭內閣德勒克多爾濟等奏土謝圖汗車臣汗二部落之汗王等捐輸銀兩呈請轉奏請旨一

摺士謝圖汗車臣汗二部落見經管理游牧旗務與未經管理之汗王貝子公扎薩克台吉閒散頭二等台吉等情願將本年正月應領俸銀扣存部庫備撥軍餉忠悃出於至誠深堪嘉尚惟該汗王等此項俸銀藉資當差所捐銀兩著毋庸賞收以示朕矜恤之至意○諭軍機大臣等據慧成奏勇頭高鴻猷李興清卽李三關本係捻匪前經楊殿邦派在揚州防剿至慧成接管各勇相繼潰散近聞李興清之勇蟻聚泗州靈璧交界之高興集地方恐於進攻廬州後路有礙等語前據袁甲三奏李興清自揚州潰逃後在靈泗交界地方以招勇爲名聚集二三千人蹤迹叵測已派臧紆青會同靈璧縣嚴密查拏是否拏獲未見續奏見在廬州尙未收復該處捻匪難保不乘機滋擾與逆賊勾結爲患著福濟卽飭帶兵員弁及地方文武迅速掩捕並知照和春袁甲三一體設法誘

拏勿令與逆匪勾結再致蔓延將此由六百里諭令知之○巡防
王大臣奉命大將軍惠親王等奏遵查侍衛阜興帶兵駐紮定福
莊巡防先後拏獲形迹可疑人犯二起業經審辦奏結此外拏獲
人犯數起審問俱無證據由附近村民保釋並無縱放奸匪之事
得旨該侍衛所討保釋放者非廢弛而何若云伊營內並無疏懈
其誰信乎第見當巡防喫緊之際驟易生手恐難得力著仍飭令
該員赴前路防堵自應倍加奮勉以觀後效此次硃批可傳與阜
興知之又奏審明被賊裹脅人犯石寶山代買火硝二次僅止引
路並未隨同打仗請發黑龍江給兵丁爲奴批石寶山代買火硝
情節尤重豈能僅科以指引道路究與甘心代買火藥者有閒試
問火硝何用與火藥何以分別又豈能以並未打仗爲從寬之據
愚民無知從賊殺人尙迫於不得已甘心代買心迹悖亂已極石

寶山著照軍法從事卽行處斬○步軍統領聯順等奏遵旨會議
南營兵丁擬分三廠按日操演五城壯勇擬歸團防處彙齊訓練
得旨據奏按日操演是何演法若徒有具文終屬無益汝等團防
處所辦之事藉以消弭竊案則可並非用以豫防逆匪何如是之
張皇爲也著一切仍循照舊章以歸覈實○戶部右侍郎王茂蔭
等奏籌辦團防彈壓布置必須得人請飭通政使崇實前任葉爾
羌幫辦大臣倭仁會同辦理得旨京內精兵數有十萬團練斷不
能有益徒覺頭緒繁冗所請著不必行崇實人頗勇敢朕另有用
處倭仁斷無幹濟之才況此事非伊所長此必何桂珍所保許者
所請該二員著亦不准行○革職理藩院尙書恩華卒予大品頂
帶○戊午諭軍機大臣等前有旨令琦善撥兵四千名向榮撥兵
一二千名馳赴安徽歸和春調遣嗣據琦善奏派馬步官兵三千

名交薩炳阿管帶由浦口六合徑達廬州向榮奏派撥楚兵一千三百餘名飭令吉順統帶督同鄭魁士由下游北渡並稱秦定三原帶貴州官兵未便更易生手本日據和春奏先後所調鎮江金陵揚州官兵請再行飛催並請飭向榮速令秦定三帶領貴州官兵來廬會剿等語逆匪見踞廬州尙無竄志趁此賊蹤未定必須厚集兵力四面兜圍急圖克復著該大臣等迅飭帶兵各員飛速前往廬州軍營以資調遣並飛催和春派員迎提不得稍有遲延儻帶兵員弁藉詞逗留卽著從嚴參辦此時江北情形極爲喫重和春軍營兵力尙單必須得力大員統帶勁兵俾資進剿諒該大臣等必能統籌全局先其所急也將此由六百里加緊各諭令知之○諭前因豫籌軍餉部議請令四川等省擬辦借徵茲據裕瑞奏稱體察川省民情惟有仿照成案勸諭紳民按糧津貼請免借

徵等語川省連年辦理防堵一切度支多係借資津貼該督仍請
循案辦理俾民間不至驚擾自係實在情形惟徵收一切責在地
方若令不肖州縣從中勒派易啟弊端著裕瑞卽嚴飭地方官選
派公正紳耆設立公局妥爲經收不復假手書役另有絲毫苛派
該督仍隨時訪察儻有前項弊端卽行嚴參懲辦並飭司詳覈各
屬津貼銀數奏請加廣學額舉額以昭優獎俟收有成數卽速派
員解京至畱充本省兵餉仍須覈實酌辦或於扣廉勸捐項內儘
先抵發不得將此項津貼竟畱一半致誤軍需將此由六百里諭
令知之○僧格林沁勝保奏官軍連日合力圍剿賊匪獲勝情形
得旨如此甚好汝二人功成之後同膺懋賞方不負朕之恩○命
科爾沁鎮國公棍楚克林沁馳赴參贊大臣僧格林沁軍營差委
○以王懿德爲閩浙總督呂佺孫爲福建巡撫炳綱署貴州布政

使由甘肅鎮
迪道署

○已未吳文鎔奏

臣

於黃州剿賊獲勝後下巴河之

賊於新正初五六日分股竄至上巴河滋擾

臣

卽派都司周祿等

冒雪前往行抵上巴河該匪等已聞風遁至隔河之竹瓦店盤踞

我兵卽趕緊覓渡鄉民代覓木筏乘夜搭成浮橋次日兵勇齊抵

竹瓦店街口賊匪伏匿不出該都司等進街誘敵軍功張開甲甫

至街中見有執大黃旗賊目一名奔來卽上前撲捕該匪等矛刺

張開甲二傷倒地張開甲帶傷掙起將執大黃旗賊目砍斃割取

首級退出街口該匪等大眾出街追來我兵四面環攻斃賊一百

餘名餘匪向下巴河逃去復徧加搜捕已無一賊容再相機進剿

報聞○庚申改定新疆南路換防兵制添派伊犁滿洲營兵二百

名烏魯木齊綠營兵一千一百名滿洲兵三百名裁葉爾羌喀什

噶爾烏什阿克蘇四城防兵一千六十二名以見裁及告畱各兵

補充缺額並就近招募易爲管兵從陝甘總督易棠等請也○辛酉諭軍機大臣等上年據崇綸奏稱賊踞巴河屢勸督臣派兵攻剿決意不從閉城坐守嗣據吳文鎔遞陳崇綸與該督齟齬及吳文鎔遵旨帶兵出省崇綸又稱俟兵餉充足督臣再行親往吳文鎔任性偏執怙促卽行朕閱該督撫歷次奏報無非彼此爭辨顯係不能和衷辦事該省大吏責任封疆若各挾私意當此防剿喫緊之際必致貽誤地方且吳文鎔摺內有崇綸駐守城上每日回署就食實有避人吸食鴉片之語著青麐將該督撫因何起釁不和緣由秉公密查據實具奏崇綸是否吸食鴉片烟著一併確查密奏不得稍有回護將此由六百里密諭知之尋奏吳文鎔因賊眾兵單矢志堅守崇綸屢迫其帶兵出城迎敵而已居守是以意見不合至崇綸吸食鴉片臣久有所聞不敢爲伊諱飾報聞○琦

善奏報進攻瓜州賊匪獲勝情形得旨見在惟有實力嚴防北竄這幾次獲勝豈能大挫兇鋒務期將瓜州之賊盡行殲戮方好又奏陷賊之人往往陽託投誠暗生狡計向榮屢用內應之策恐無益於事批向榮殊不曉事輕率已極○命已革廣東高廉鎮總兵官楊昌泗畱湖北軍營效力○王戊諭內閣僧格林沁勝保奏連日勦辦逆匪情形並請將前次追賊出力官兵酌量保奏一摺逆匪由獨流靜海竄至東城村一帶經僧格林沁帶兵追勦頗有斬獲尙屬奮勉及至逆賊占踞村莊仍復遷延數日未見立功勝保自到獨流經朕屢次嚴諭務將此股逆匪掃除淨盡不准再有竄逸乃以圍攻數月之賊又任乘間逃竄致滋蔓延攻勦未能得手堵禦又復不力僧格林沁勝保均屬罪無可追朕屢次寬宥不加嚴譴正冀其奮勉圖功稍贖前愆本日據奏勦賊各情雖經疊有

斬獲總未能痛加勦洗亦不過敷衍塞責耽延時日見在德勒克色楞瑞麟慶祺培成伊勒東阿達洪阿等督帶官兵均已次第到營大兵雲集豈可再失事機著該大臣等卽督飭各路官兵趕緊進攻合力兜圍務將此股逆匪全數掃除肅清畿輔若再遲延貽誤國法豈能倖逃所有初九初十等日追賊打仗官兵擇其尤爲出力者秉公酌保候朕施恩毋許冒濫○諭楊以增袁甲三奏勦辦潰勇獲勝各一摺揚州勇目李興清卽李三鬧潰逃後至原籍泗州盤踞高家集豎旗築壘聚眾搶掠實屬罪大惡極見經楊以增袁甲三撥派兵勇會同勦辦業將該匪大股殲斃殆盡惟首匪李三鬧尙未弋獲著楊以增袁甲三仍督飭文武員弁迅速掩捕毋令漏網鄉民練勇有能將首犯購獲者據實保奏所有此次出力員弁兵勇並著楊以增袁甲三查明奏請獎勵毋許冒濫

○袁甲三奏查皖省壽州六安向稱庶富久爲賊所垂涎且壽州之正陽關爲賊西竄豫省門戶六安爲賊南竄豫省門戶見在兩處偏近賊烽距廬郡一百八十里人心惶惑賊報一日數緊近聞賊之奸細直至六安張貼僞示揚言賊股不日直竄六安城內居民遷徙已空該州又經江忠源於四城外豫空壕塹見在無兵可守萬一賊匪卒至徒授寇資廬州喫緊和春無兵可撥萬難兼顧竊思豫省防堵之兵紮在數百里外散漫無濟不若通撥防兵進剿正陽六安總扼入豫門戶正陽六安無虞豫省即可安堵請飭下河南撫臣飛催各路防兵分布正陽六安兩路嚴密防堵以資扼守 上諭軍機大臣等據袁甲三奏皖省壽州六安恐爲賊所覬覦壽州正陽關爲賊西竄豫省門戶六安爲賊南竄豫省門戶見在兩處偏近賊烽請撥兵嚴防等語此時廬州正當剿辦喫緊

之際和春兵力勢難兼顧河南防兵正可越境扼要堵剿固豫省之藩籬卽以杜北竄之要路著英桂飭令河南與安徽接壤防兵馳赴正陽六安兩路嚴加防守並飭徐廣縉等督帶兵勇前往相機剿辦不可株守本境坐視鄰省賊匪紛竄致誤事機將此由六百里加緊諭令知之○僧格林沁等奏逆匪礮火猛烈難於逼近其巢擬俟大礮運到極力攻剿得旨昨有寄諭朕謂僧格林沁數月間未見振作勝保辦理軍務毫無成效今覽此奏固非有意遷延然止言其難以待大礮爲辭豈能任其喘息已定又肆猖狂汝二人何若是昧於事機再令竄逸尙成何事體著趕緊剿洗以符朕所定期限又奏生擒賊犯供稱該逆欲乘隙圖竄批可見該逆未有久踞之意攻剿更應得手解散脅從隨時酌量出示辦理見當喫緊之際礙難降旨由汝等辦則可然不能若勝保以前所奏

長跪漫無限制也○袁甲三奏見在揚儀收復賊斷不至北
山東請飭厲恩官移駐臨淮得旨厲恩官亦不能舍東省之防
遠赴皖省又奏請嗣後凡關涉籌款摺件卽由軍機處轉交承辦
衙門如有應行知照之處該衙門自行咨會毋庸發交內閣致各
處報房濫行鈔傳以昭慎密批所見甚周著照所請軍機大臣等
留心辦理毋稍疏忽○癸亥諭軍機大臣等昨於僧格林沁勝保
摺片內批諭解散脅從一節隨時酌量出示辦理不能若勝保以
前所奏投戈長跪漫無限制因思該逆亡命長驅專以裹脅爲事
見在奔竄餘匪其老賊爲數尙多而被脅隨行者亦復不少誠恐
愚氓無知悔罪思歸投誠無路轉堅其從賊之心爲該匪拒守之
助惟在該大臣相機酌辦或出示曉諭射入賊壘使賊黨自相疑
貳或臨陣豎旗如能殺賊投誠及自拔來歸確有憑據者准其免

罪隨時妥爲安置並酌量咨遣回籍其有設計詐降圖爲內應者尤當隨機應變察其真偽賊情詭譎不可不加意防備萬勿墮賊奸計著僧格林沁勝保妥籌辦理於解散之中寓區別之意庶足以孤賊勢而杜奸謀至連日進攻情形並著趕緊設法剿除毋得以守候大礮爲詞致令再有竄逸將此由六百里諭令知之○甲子諭軍機大臣等怡良許乃釗奏節次攻剿獲勝一摺上海蕞爾孤城滋事匪徒不過烏合之眾何至圍攻數月迄無成功詳閱所奏西北一帶文武員弁尙皆出力而東南隅兵勇僅止堵截牽制至吳健彰水營不過守護礮臺隔江轟擊似此任意遷延何時始能蕙事前此誤聽撫議果致謝繼超遇害事機中變剿辦大局重費經營該署撫猶復不鑒前車嘵嘵以撫事無成爲惜所見抑何迂謬著卽督飭水陸帶兵員弁盡力進攻總以克復城池爲要不

准再爲浮言所惑亦不准以難辦爲詞妄希延緩許乃釗自奉命
幫辦軍務以來久駐金陵並無尺寸之功今統領全軍勦此窮寇
尙不能迅速掃除毋怪其坐視粵匪久踞長江一籌莫展也且本
任巡撫應辦之事如接濟軍餉籌辦海運處處皆關緊要乃竟因
小醜牽制一概置爲後圖專恃仰給於鄰省自問何顏膺茲重寄
吳健彰稍有機變以其尙能羈縻夷人未遽加以失守城池之罪
乃當逆匪起事之時卽潛身夷館迫夷酋狡詐阻撓又止安坐水
船往來傳話此一通事所能了於事何濟著許乃釗嚴諭該道務
將奸謀設法杜絕以便攻勦若再不加奮勉朕必將許乃釗從重
治罪卽吳健彰亦不能以職分較輕倖從寬典也所有十二月十
五日進攻陣亡各員卽查明照例請卹將此由六百里加緊各諭
令知之○諭戶部侍郎羅惇衍奏京倉支絀請飭廣東採買米石

以資接濟一摺前以江南等省漕運到通恐有梗阻降旨令葉名琛柏貴勸諭官紳捐銀辦米運赴上海兌收轉運天津又據該督撫等將辦理情形覆奏茲據該侍郎奏京摺亟應籌備廣東高廉雷瓊等府素爲產米之區且洋米到粵者尤爲饒裕請飭官爲採買徑運天津並請於屯田溢坦地畝變價及捐輸銀兩內撥款辦理等語本年江安江西湖南湖北等處漕糧未能運通江蘇浙江海運尙未兌收放洋其餘省分復有截畱蠲緩之處自應及早綢繆以裕支放著葉名琛柏貴體察情形飭屬籌辦見在上海縣城尙未克復所購米石自應設法運至天津兌收以期安速其屯田溢坦地畝變價一事前飭該督撫等妥辦會否積有成數見於勸諭捐輸外有無可撥之款務期悉心籌畫酌量購買不得以籌款維艱空言了事並著該督撫於接奉此旨後迅將籌辦情形由驛

具奏原摺著鈔給閱看將此由五百里諭令知之○以吳其泰爲

江蘇按察使

由糧儲道遷

○乙丑諭內閣理藩院奏喀爾喀扎薩克郡

王托爾托瑚圖魯捐備銀兩奉經呈請轉奏請旨一摺喀爾喀扎

薩克郡王托爾托瑚圖魯見以賊氛未靖情願將前未賞收之銀

兩捐輸寺院奉經祈禱忠悃出於至誠深堪嘉尚著准其在伊該

游牧廟宇奉經○諭軍機大臣等前因逆匪竄擾江面未能肅清

諭令湖北湖南各督撫製備戰船並令葉名琛等購買夷礮千餘

尊解至武昌配搭船隻爲水陸夾攻之計茲據葉名琛等奏稱委

副將懷塔布購買夷礮三百二十尊備齊礮架礮具等項由廣東

派員押解啟程至韶州府樂昌縣經湖南宜章等縣直抵湖北武

昌省城投收等語前據會國藩奏新造戰船共四百號礮位須八

百尊始敷分配廣東購買頭起礮位八十尊已於十二月到衡見

據葉名琛等奏二起三起礮位業於十一月內先後起程此項礮位著駱秉章會國藩派員迎提趕緊分配船隻仍須選派得力將弁慎重督帶以期有濟實用不准稍有疏虞如曾國藩先已起程卽著吳文鎔駱秉章崇綸派員解交會國藩駛赴長江下游以備水陸夾擊迅殄賊氛肅清江面並著該督撫等分飭沿途地方文武妥爲護送其不敷礮位仍著葉名琛等派員陸續趕緊購買設法解運毋稍遲誤將此由六百里各諭令知之○丙寅諭內閣前因勞崇光奏請將調補江西九江府知府李孟羣暫畱廣西督辦捕務已有旨允准本日據張芾奏稱九江界連楚皖籌防緊要員缺未便久懸等語調補江西九江府知府李孟羣著卽開缺畱於廣西以知府候補○諭扎拉芬奏喀爾喀二部落蒙古呼圖克圖等因軍務未竣捐備銀兩駝馬呈請轉奏請旨一招扎薩克圖

汗三音諾顏二部落汗王公扎薩克台吉等及車臣汗部落頭等
台吉車林多爾濟二部落之呼圖克圖等情願各捐銀兩駝馬並
在本部落喀經祈禱哀憫出於至誠深堪嘉尙惟該蒙古人等此
項銀兩牲畜藉資生計且本年雨雪較多道路泥滑軍需駝隻不
甚得力張家口距該部落又復寫遠若盡行賞收朕心實爲不忍
著扎拉芬泰等轉諭該蒙古呼圖克圖等所捐銀兩駝隻毋庸賞
收惟所捐馬四百匹卽著賞收並准該呼圖克圖等各在本部落
喀經以示朕矜恤蒙古之至意○諭駱秉章會國藩奏勦辦土匪
事竣一摺上年湖南永興土匪圖劫軍餉礮位並竄赴縣署搶掠
經該州文武及委員羅澤南等分起勦辦首要各犯多被殲擒其
道州四眼橋之匪亦經各路兵勇合力勦捕殲擒多名見在地方
一律肅清其逸出匪徒仍著駱秉章等飭屬接拏勿畱餘孽所有

在事出力之文武員弁紳士兵勇人等著駱秉章會國藩擇其尤爲出力者酌量保奏候朕施恩毋許冒濫○追予江西陣亡總兵官馬濟美建立專祠○予江西陣亡遊擊蔣式璘等祭葬世職○予湖南陣亡典史王鑾等祭葬世職○丁卯諭內閣前有旨令惠親王於尋常召對及內廷宴賚均無庸叩拜遇有賞賜物件並著具摺謝恩無庸當面叩首原以惠親王係朕之叔行輩甚尊若令常行叩拜朕心實有不安數年來王於召見賜坐時仍行叩拜尙未深悉朕衷嗣後除朝會大典外惠親王於召見便殿賜坐時著仍遵前旨不必叩拜並著於該管各衙門帶領引見時無庸入班帶領以示朕敬長親親有加無已至意王其上體朕心不准固辭○諭軍機大臣等僧格林沁勝保奏連日攻剿情形一摺該大臣等會督大兵追剿竄匪將及兩旬屢次奏報均不過小有斬獲似

此窮蹙奔突喘息未定之賊尙未能大加懲創剋日掃除前經切責該大臣等不知愧勵奮勉迅圖殄賊總以專待大礮爲詞逐日遷延何時始能竣事若待該逆零星逃竄始議處處兜拏則兵力旣分辦理更形棘手且束城等村與獨流之可以負隅久踞者迥別何以不能逼近賊壘是否該逆又經築有木城該大臣等匿不以聞卽逆匪於牆孔施放槍礮該處不過民間住戶輒土矮牆何至堅厚若此難以攻破東西兩路分兵疊進該逆均得由束城分股接應該大臣等所謂智取者何在披圖詳閱各營盤踞賊巢較遠且朕聞僧格林沁勝保大營亦與賊營不近況西南一帶尙屬空虚恐布置未臻嚴密兜剿必難周而見在大礮已到三尊其餘指日亦可運到該大臣等無所藉口耽延著卽督飭各路將弁兵勇趕緊設法急圖殲滅之方斷不准再令逆匪乘閒竄逸經文岱

蘊秀前帶官兵不能遏賊西竄厥罪甚重該二員見在何處著卽查明下落據實具奏僧格林沁所保之頭等護衛那木薩賚扎布係何人所帶有何勞績著一併查明具奏將此由六百里加緊諭令僧格林沁勝保等知之○諭崇綸青麐奏探聞黃州營盤被賊攻焚兵勇全行潰散一摺覽奏殊堪詫異逆賊竄踞黃州前經吳文鎔督兵進剿疊次奏報尙有斬獲乃此次進仗竟致兵勇相繼潰逃全軍敗散且營盤十一座盡被賊匪焚燒總督吳文鎔並有騎羸避至靈沙河之事亦不知下落見在逆眾占踞堵城大營並聞陽邏一帶已有賊船陸續上竄若不趕緊迎頭堵剿必致賊勢愈張辦理更形棘手台湧見駐德安著卽酌帶官兵馳赴前路確探賊蹤所向盡力迎剿其逃散兵丁仍當招集至該處募勇屢次遇賊首先潰逃恐有奸匪從中勾結必須加意嚴防毋蹈前轍該

將軍當此軍情緊迫之際惟當激勵將士星速趨程前進總以迅掃妖氛爲要毋得稍事遷延致有貽誤並將酌帶兵數起行日期先行由驛馳奏仍確查吳文鎔見在何處各員弁如何下落及此次失事實在情形切實具奏又據崇綸等片稱探聞唐樹義統領舟師因見火起兵散將礮船退至葉家洲等語此項礮船著毋庸撤回省城一併歸台灣統帶調遣以備水陸夾攻所有德安北路等處仍著台灣設法兼顧毋稍疏虞將此由六百里加緊諭令知之○諭據崇綸青麐奏探聞黃州兵勇潰散營盤被賊焚燒一摺賊船既有上竄陽邏之信省城重地關係緊要著崇綸青麐督同文武激勵兵民合力固守毋得藉口人心不齊稍疏防備所有魁玉見帶之官兵一千名卽著畱於省城毋庸隨同台灣前進漢口一鎮爲自江入漢要路設賊匪逞其故智揚帆直上荆襄德安等

處均屬可慮漢陽近在對江該撫務當設法撥兵防守勿令賊船
闖越儻有疏虞朕惟該撫等是問唐樹義所帶礮船雖不甚多惟
見在湖南礮船尙未抵鄂江面攻剿尙賴有此利器已諭知台湧
於進攻時酌量調派以備水陸夾擊遏其兇鋒至各處土匪乘閒
肆搶必應及早嚴拏方免勾結該撫身任封疆該學政亦係特派
防堵大員豈能坐守無策僅以人情險惡一奏塞責總之嚴守省
城力扼漢陽漢口皆係該撫等之責其黃州一帶賊匪仍與台湧
會同勦辦不得專待援兵致成株守吳文鎔見在何處隨營文武
如何下落均著速查詳奏將此由六百里諭令知之○琦善奏進
攻瓜州賊匪獲勝見在聯絡水師諭令夾攻得旨水陸夾攻自可
得手著卽趕緊進攻剋日殲除不准以尙未得手搪塞又奏統帶
水師各總兵統歸向榮調遣恐呼應不靈得旨統歸汝調遣不遵

者卽行正法○賞參贊大臣僧格林沁等巴圖魯名號○戊辰諭
軍機大臣等昨據崇綸等奏黃州兵勇潰散情形當諭知台湧迅
卽統兵馳赴前路迎擊本日復諭令駱秉章由湖南調撥官兵一
二千名卽飭令會國藩卽日配帶舟師駛赴下游與台湧會合夾
攻茲據台湧奏稱大營失利情形緊急並探聞賊匪水陸已至漢
陽覽奏實深焦灼仍著台湧遵照昨日寄諭通籌江北大局一面
布置要隘一面督兵前進以期力挫兇鋒遏賊北竄所有荆襄等
處據奏已飭各該文武大員妥籌堵禦仍飭該將軍嚴飭帶兵各
員實力堵禦務與防守豫境邊界之巡撫英桂總兵柏山聯絡聲
勢互爲應援武昌爲省垣重地漢陽近在對江應如何設法兼顧
並著該將軍相機籌辦至台湧所帶官兵是否足敷截剿前據青
馨奏稱查有四川松潘建昌兩鎮統帶官兵已來湖北之巴東利

川二縣防守等語此項官兵原爲保障川省門戶而設惟遠防不如近扼已據青麐咨商裕瑞酌派該鎮帶兵二千名前赴漢口一帶卽著該將軍迅速飛催前進爲移緩就急之計並統歸台湧調遣以資協勦武昌防守情形並著隨時探明速奏將此由六百里加緊諭令知之○諭本日台湧奏稱賊匪水陸並進竄至漢陽該將軍已飛調官兵在武勝關外一帶與豫省防兵互爲聯絡以壯聲勢惟賊勢猖獗意圖北竄固楚北之藩籬卽可以保河南之門戶英桂見在汝陽與湖北黃陂等處接壤台湧所帶兵力尙形單薄恐未足挫此兇鋒此時楚北情形十分喫緊亟宜以勦爲防著英桂飛催總兵柏山選帶精兵出境截殺與台湧聯兵應援迅蕩賊氛不得區分畛域但知防守本境置鄰省於不顧稍有疏虞罪將誰諉其光州信陽各處與德安麻城毗連並著英桂飭督所屬

一體嚴防毋稍疏失至湖北大兵雲集所需火藥軍餉如有應行接濟之處仍著該撫與台湧隨時知照妥爲辦理將此由六百里加緊諭令知之○諭本日據台湧奏稱賊匪水陸已至漢陽其德安襄陽等處皆與豫省接壤甚關緊要台湧遵旨前進亦未必能多帶官兵黃州潰兵卽收集亦不甚得力鄰近省分萬無可調惟有湖南撥兵應援最爲近便著駱秉章迅速選派精銳官兵一二千名並曾經戰陣諳悉賊情之將弁管帶前赴湖北交台湧調遣毋稍延緩見在賊蹤已距武昌甚近唐樹義師船因岸上官兵潰散撤回武昌見已有旨諭令台湧調遣水陸堵禦尙形單弱省城兵勇合計約有六七千名僅能分布要隘漢陽漢口恐難兼顧儻逆匪泝漢而上窺伺荆襄攻剿更難得手此時惟有會國藩統帶礮船兵勇迅速順流而下直抵武昌可以扼賊之吭此舉關繫南

北大局甚爲緊要見已逾正月中旬船勇當早齊備廣東所購洋礮諒已陸續解到著會國藩迅卽統帶剋日開行由長江下駛與台湧會合並督同唐樹義師船水陸並進以期力遏兇鋒肅清江漢此時水路進剿專恃此軍接應昨據崇綸等奏業已咨催諒該侍郎必能深悉緊急情形兼程赴援一切機宜卽與台湧會合妥籌和衷商辦毋失事機將此由六百里加緊各諭令知之○己巳諭內閣前據向榮奏保剿匪出力之署江蘇六合縣知縣溫紹原會經降旨以知府用暫畱本任茲復據怡良許乃釗奏該署縣團練壯勇製備船隻器械於逆匪竄擾縣境督勇堵剿力保危城懇恩優獎並請加增學額酌蠲錢漕一摺溫紹原勸諭團練先事豫防爲民保障洵屬奮勉出力著再加恩賞帶花翎以昭激勸至該縣紳董深明大義隨同該縣堵剿甚爲出力並著加恩蠲免該縣

一年錢漕以示破格優獎其應如何增廣學額年分名數著該部
覈議具奏○諭僧格林沁勝保等奏進攻逆匪獲勝一摺二十六
日僧格林沁督兵先攻東城村逆匪堅匿不出復折赴徘徊村會
同勝保督兵進攻達洪阿帶領健銳火器等營及古北口官兵天
津壯勇攻其西南天津固原官兵及四川山東河南練勇攻其東
北逼近村邊達洪阿親冒鋒鏑奮勇直前將該逆鹿角寨拆毀賊
匪情急於村口分股撲出我兵兩路合力夾擊斃賊百餘名賊眾
披靡復有賊千餘名由東城陳官村撲出經天津固原官兵施放
連環槍礮瑞麟亦用銅礮向賊眾轟擊培成督帶馬隊從西面攻
剿斃賊百餘名步隊官兵奮勇繼進又追殺數十名其由東城以
北攻撲桃園之賊亦經西凌阿督飭副將史榮椿等開放劈山礮
轟斃賊匪三十餘名賊馬十餘匹又經黑龍江察哈爾馬隊由兩

翼截殺賊匪十餘名另股賊匪攻撲王村經總兵孔廣順督兵奮
擊殺賊多名逆匪竄踞束城各村屢欲乘間逃逸經僧格林沁勝
保親督官兵奮力擊退斃賊甚多見在大礮業已運到著僧格林
沁勝保乘此聲威迅速進剿斷不准再有延誤○諭軍機大臣等
僧格林沁勝保等奏進攻獲勝等情一摺前據該大臣等奏大礮
已運到三尊其餘礮位亦可陸續到營密訪各營於二十六日齊
隊奮攻朕以爲一切布置必有把握可期一鼓蕩平乃本日據奏
進剿情形仍不過小有斬擒且有賊匪鈔入雙成營盤焚毀帳房
傷損馬匹之事該大臣等前奏所謂布置周安在耶見在廬州
等處賊匪復肆鴟張仍圖北竄又據崇綸青麐台湧先後奏到黃
州大營失利營盤盡被賊匪焚燒兵勇全行潰散探聞賊匪水陸
已至漢陽江北情形如此緊急該大臣等尤應兼籌並計肅清畿

輔爲移兵南下之舉此時河間一帶勦匪情形關繫大局必當迅速殲滅或聚而殲旃或誘令出巢四面兜擊務將首逆擒獲餘匪自不難勦洗僧格林沁勝保統領大兵經朕屢次嚴諭切責宜如何奮勉立功以圖報稱乃此次奏報挑長壕則以人夫逃散爲詞攻賊壘則仍以待運大礮藉口似此任意耽延日復一日儻然楚賊黨北竄與此股逆匪勾結勦辦更難得手該大臣等惟當懍遵疊次諭旨趕緊設法攻勦迅速奏功以慰朕念毋得再有遷延致干重罪將此由六百里加緊諭令僧格林沁勝保等知之○諭昨因台湧奏探黃州官兵勦賊失利賊至漢陽該將軍所帶官兵尙形單弱諭令英桂飛飭柏山帶兵出境與台湧聯絡應援茲據該撫奏稱統籌豫省全局北路重於南路所有光州汝甯信陽一帶責成鎮道等會商堵勦該撫帶兵回省確探賊蹤隨時籌度等語

此時楚北情形較之河南彰衛等處尤爲緊急賊勢猖獗必須防其北竄著英桂卽遵前旨嚴催總兵柏山飛速帶兵前進以剿爲防與台湧所帶官兵聯爲一氣以期力遏賊氛該撫見已回省儻楚豫交界地方情形緊急調度恐致有誤著卽折回汝陽等處督同南汝光道余炳燾汝甯府知府廖姓妥爲守禦無失事機見在靜海獨流逆匪竄踞河間縣屬之束城村一帶經僧格林沁勝保等屢次斬擒勢甚窮蹙亦難保不衝突南奔河北一路與直隸毗連著卽嚴飭地方文武員弁加意嚴防各處渡口尤不可稍涉大意致令逸匪偷渡該撫身任封疆務當權衡緩急相機策應不得以專防北路爲詞轉將南來楚匪委之柏山一人堵剿致有疏虞將此由六百里加緊諭令知之○諭據雷以誠奏瓜州東路緊要請添募練勇等語前因該革員奏稱存勇過多當諭令琦善酌量

裁汰仍畱二千餘名交雷以誠管帶如果緩急足恃已可協助兵力況前次揚州儀徵賊匪紛竄半因潰勇所致練勇之不足恃已可概見所請添募之處著不准行此時移營前進雷以誠尙在萬福橋是否係扼要之處著琦善體察情形或將雷以誠併歸前營飭令助剿瓜州逆匪並著斟酌辦理將此由六百里諭令知之○諭德勒克多爾濟等奏俄羅斯固畢爾那托爾呈請轉解給伊住京喀喇喇嘛等銀兩一摺見據該大臣等查明自道光三年經前任庫倫辦事大臣蘊端多爾濟等奏駁後迄今並無似此懇求由驛解送銀錢之事自係窒礙難行此次回文若業經咨行卽著照該大臣等所請將解來銀兩瑪爾爾眼同恰克圖部員平兌封妥轉解斷不准援以爲例若未經咨行該大臣等卽傳知俄羅斯等應照舊章給與恰克圖商民等工食令其運解見在此等尋常事

件該大臣卽不必請旨嗣後俄羅斯地方遇有例外懇求事件該大臣等卽行明白曉示遵照舊章辦理不可另生枝節○向榮奏自分撥楚兵赴廬兵力較減進攻未能得手並以上海久稽克復撥兵一千九百名馳往助剿得旨汝在江南勞師糜餉日久無功任賊紛紛竄逸蔓延畿輔雖立斬汝首尙不足蔽汝一人之罪尙不足稍洩數省積忿萬人之心第一時乏人姑念汝自廣西至今情形尙熟暫畱汝項上之首以待汝奮勉立功若每次奏報仍不過敷衍塞責是汝無福不能承受朕恩自速其死○予陣亡參領恭訥春祭葬世職○是月貸江西建昌等七縣被賊難民籽種口糧緩徵直隸薊州等五十九縣被水村莊新舊額賦及津軍應募漁課山東濮州等四十四州縣被水被旱被風被雹村莊額賦及各項銀租加賑保定等四縣貧民一月口糧蠲緩山西垣曲等二

縣被擾村莊新舊額賦並給貨口糧籽種浙江海甯等二十州縣
上年被災地畝漕糧杭州等三府及於潛縣災區未完帶徵額賦